

## Josua 2

**1** Josua seun van Nun het van Sittim af in die geheim twee verkenners uitgestuur en vir hulle gesê: “Gaan kyk die land deur, veral Jerigo.” Hulle is toe weg en het uitgekóm by die huis van ’n prostituut met die naam Ragab en daar tuis gegaan.

**2** Die koning van Jerigo het berig gekry dat daar in die nag van die Israëliete afmense aangekom het om die land te verken, **3** en hy het vir Ragab laat weet: “Lewer die manne uit wat na jou toe, na jou huis toe, gekom het. Hulle is hier om die land te verken.”

**4** Die vrou het die twee manne weggesteek en vir die koning laat weet: “Daar het manne by my aangekom, maar ek weet nie waarvandaan hulle is nie. **5** Hulle het met donker vertrek toe dit tyd was vir die stadspoort om te sluit, en ek weet nie waarheen hulle is nie. Maak gou en agtervolg hulle. Miskien haal u hulle in.

” **6** Sy het die twee manne intussen op die dak laat klim en hulle weggesteek onder die vlasstoppels wat sy daar oopgesprei het. **7** Die koning se manne het na die twee verkenners gaan soek op die pad na die Jordaan toe, in die driewe se rigting. Nadat die agtervolgers weg is agter die verkenners aan, is die stadspoort gesluit.

**8** Voor die verkenners aan die slaap geraak het, is die vrou na hulle toe op die dak **9** en het sy vir hulle gesê: “Ek weet die Here gee vir julle die land; ons is skrikbevange vir julle, al die inwoners van die land bewe van vrees vir julle. **10** Ons het gehoor hoe die Here die water van die Rietsee voor julle laat wegdroog het met julle trek uit Egipte, en ook wat julle met die twee konings van die Amoriëte oorkant die Jordaan, met Sihon en Og, gedoen het, hoe julle hulle voor die voet uitgeroei het. **11** Ons het dit gehoor en ons harte het van angs verstyf. Niemand het nog moed teen julle nie, want julle God, die Here, is God, bo in die hemel en onder op die aarde.

## Die verkenners in Jerigo

**12** “Ek het julle goed behandel. Lê dan nou vir my ’n eed voor die Here af dat julle my familie ook goed sal behandel, en gee my ’n betroubare aanduiding **13** dat julle my pa en ma, my broers en susters en almal wat by hulle hoort, se lewens sal spaar en ons so van die dood sal red.” **14** Toe sê die manne vir haar: “Ons staan met ons eie lewe in vir julle s’n. As julle nie oor ons praat nie en die Here gee ons die land, sal ons jou goed behandel en ons woord hou.” **15** Sy het hulle met ’n tou deur die venster laat afsak; haar huis was in die stadsmuur ingebou, sodat sy in die muur gewoon het.

**16** Haar woorde aan hulle was: “Gaan die berge in sodat die mense wat na julle soek, julle nie raakloop nie. Kruip drie dae daar weg tot hulle die soektog staak. Daarna kan julle julle koers gaan.” **17** Die manne het vir haar gesê: “Die eed wat jy ons laat aflê het, sal ons net bind **18** as jy, wanneer ons die stad aanval, hierdie bloedrooi tou vasbind aan die venster waardeur jy ons laat afsak, en jou pa en ma, jou broers en jou hele familie by jou in die huis bymekaarhou. **19** Enigeen wat by jou huis se deure uitgaan buitentoe, sal self vir sy dood verantwoordelik wees, nie ons nie. Ons hou ons verantwoordelik vir enigeen wat by jou in die huis is; daar sal nie ’n hand teen hom gelig word nie.

**20** En as jy oor ons praat, is ons nie gebind aan die eed wat jy ons laat aflê het nie.” **21** Sy het gesê: “Laat dit wees soos julle gesê het,” en sy het hulle laat gaan en hulle is weg. Sy het toe die bloedrooi tou aan die venster vasgebind. **22** Hulle het vertrek en is die berge in. Daar het hulle drie dae gebly tot die mense wat hulle gaan soek het, teruggekóm het. Die mense het langs die hele pad gesoek en niks gekry nie. **23** Daarna het die twee manne uit die berge teruggekóm en is hulle die rivier oor na Josua seun van Nun toe. Hulle het hom alles vertel wat met hulle gebeur het. **24** Hulle het vir Josua gesê: “Die Here gee die hele land oor in ons mag. Al die inwoners van die land bewe van vrees vir ons.”

# VRAE VIR DIE WEEK SE BYBELSTUDIE AS GESIN

## Maandag (oor)

- 1 Wat hoor jy?
- 2 Wie het Josua gestuur?
- 3 Wat was besig om daar te gebeur?
- 4 Na wie toe stuur God jou die week?



## Dinsdag (oë)

- 1 Wat sien jy?
- 2 Wat was die naam van die vrou?
- 3 Hoe het hulle gevlug?
- 4 Het jy iemand raakgesien of bygestaan?



## Woensdag (hartjie)

- 1 Wat ervaar jy ?
- 2 Wat het die vrou oor die Here gesê?
- 3 Wat is afgelê tussen hulle?
- 4 Hoe dink julle het dit haar laat voel?
- 5 Het jy al 'n keuse gemaak vir God?




## Donderdag (hand)

- 1 Wat het sy laat sak?
- 2 Kan ons nog 'n verskil maak in die wêreld?
3. Moet ons soms kies teen ons eie groepe vriende of mense?
4. Hoe reageer ons elke situasie as God iets van ons vra?



# WOORPUZZLE PRET OM SAAM U KIND TE GENIET



## Af

- 1 **Wie het die verkenners gestuur?**
- 2 **Wat was die vrou se naam wat hulle gehelp het?**
- 3 **Wat is gesluit?**
- 4 **Hoeveel verkenners is uitgestuur?**
- 5 **Waaruit het hulle onsnap?**

## Dwars

- 1 **Waar het die verkenners weggekruip?**
- 2 **Wat moes hulle aflê ivm die prostituut se familie?**
- 3 **Wat moes met hulle lewens gebeur?**
- 4 **Waar moes hulle wegkruip vir drie dae?**
- 5 **Hoe het Jerigo se inwoners gevoel teenoor God?**